

منى الغريب

# خِلاص الكلام

أشعار بالعامية المصرية

الطبعة الثانية



## بطاقة الكتاب

-----

عنوان المؤلف : خِص الكلام  
المؤلف : منى الغريب  
التصنيف : أشعار بالعامية المصرية  
رقم الإيداع : ٢٠١٩/١٣٠٣٢  
الترقيم الدولي : ٩٧٨/٩٧٧/٦٧٢٦/٢٠/٨  
عدد الصفحات : ١٠٠ صفحة  
رقم الإصدار الداخلي : ٤٤٣  
تاريخ الإصدار الداخلي : ٢٠١٩ ، طبعة ثانية  
تصميم الغلاف والتنسيق : الشاعرة منى الغريب

جميع حقوق الطبع والنشر محفوظة للشاعر، ولا يحق لأى دار  
نشر طبع ونشر وتوزيع الكتاب إلا بموافقة كتابية وموثقة من  
الشاعر

-----

**مؤسسة النيل والفرات للطبع والنشر والتوزيع**

ثورة مصرية تشرق إبداعاً على الوطن العربي

رئيس مجلس الإدارة

**ناجى عبد المنعم**



مؤسسة  
**النيل والفرات**  
للطباعة والنشر والتوزيع  
أسستها الشاعرة ناجى عبد المنعم  
حجج 2007

رخصة مزاولة مهنة: 58365 - سجل تجاري: - 2017 / 13242 - بطلانة ضريبية: 35-01-572

عضو عامل باتحاد الناشرين المصريين رقم 941 لسنة 2018

هاتف: 01011256943 - 0111620218 - 011202541192 - 01202541192 - 020554372901

التيل والفرات [nagyegy200064@gmail.com](mailto:nagyegy200064@gmail.com) [alnillwaalfourat@gmail.com](mailto:alnillwaalfourat@gmail.com)

المقر الرئيسي: ج.م.ع. محافظة الشرقية - العاشر من رمضان - مجاورة 13 - امام سنتر الـ 13 - عقار 304

# الإهداء

إلى ...

أبي ( رحمه الله )

الذي علمني عشق الحرف

وأدين له بكل ما بقلبي وقلمي من حروف

.....

منى الغريب

عضو اتحاد كتاب مصر

عضو رابطة الزجالين وكتاب الأغاني

مؤسس نادي أدب القلج

## إبعديني

قد ما قربت منك ...

إبعديني

قد ما شال قلبي عنك ...

ضيعيني ... واقتليني

وادفني .. بين ترابك

رجعيني لأصل خلقي

واحدفني من ولادك

قولي راح ويأ اللي راحوا

قولي ناحوا

عليه خواته

لما قال لي ...

إبعديني

.....



## إفكرتك

افتكرتك راح تقول لي  
كل كلمة كاتبها ليكي  
وان كل حروفي تفدي  
نظرة واحدة من عينيك  
وافكرت كل نقطة  
من مداد حرفك لحي  
وان إحساسك تملّي  
نبضة من قلبك لقلبي  
مهما كان شكل الحروف  
حتى لو مليانه خوف  
يتولد منها الطريق...  
قلبي راضى بكل لحظة  
فيها شوق إحساس برئ..  
مهما كان طعم الكلام..



حتى لو حرفين كلام...  
قلبي راضى بأي شئ....  
خلى حرفك جوه قلبك.  
قلبي مش ناقص ملام

....

## الحق ضائع

كان معايا وبين إيديا... وروحي فيه

كان حياتي ونور عيني... ..

كنت باتسند عليه

كان بيقضي لي حاجاتي

كان بيطمّن ليلاي... الدوا يامه خديه

كنت بافرح لما ييجي

بصوت حنين .. والتقيه

بين ضلوعي ف حضن دافي ..

وقلبي بيطنّب عليه

كان مناه أحلام بسيطة.. وقلبه طيب

كان صحابه ف أي زنقه

يلجأوله عشان قريّب

كنت هااخطب له السنة دي

بعد مايخلص شهادته

أصله من أول ميلاده  
كان بيعشق بنت خالته  
جت له اعفا عشان وحيدي  
مات أبوه من يوم ولادته  
من ساعتها وهو ابويا  
يرعى حالي ..وأنا بنته  
لما قال لي يامه خارج  
لجل مانعدي بأحلامنا الحدود  
لجل مانكسر من الإيد القيود  
لجل أعيش العمر شايف  
كل أولادي أسود  
لجل حرية وكرامة  
لجل ما تقوم البلد دي  
بالسلامة والصمود  
لو هموت يا امايه سامحي..  
وادعي ربي أكون شهيد

و زيّ ماتكون السما  
كات فاتحه بابها  
لسة ماخلصش النهار  
جاني الخبير راح زين شبابها  
مُت يابني... وسبت قلبي جوه حزنه  
مت يابني وانخطف من حضني حضنه  
قُلْتُ قَدَّر ربنا... ومكتوب عليا  
انحرم من ضيّ قلبي ونور عيني  
قالوا: هانجيب حقهم كل اللي ماتوا  
قلت يتحرّم على بدني السواد  
ولا أقيم عزا قبل ماخذ حق ابني والولاد  
السنة عدت وراها ألف عام  
والوعود دابت مع موت الكلام  
القاتلين دول معروفين بالإسم كام  
والكل شايف ع الملاً .. وسط الزحام  
وبعد عمري ما انطوى ..

حزن وجوى

على زين شبابها

النهاردة بس ياابني مُتّ تاني

دمك الغالي ملا تويي وكياني

حتى الشوارع والحارات

مليانة ناس

والكل بينادي القصاص

والقاتلين جوه السجون

خَمَسْ نجوم ..متنعمين

وان كنت تعقل حضرتك؟

كان فيه سؤال..

واقف على طرف اللسان

سؤال برئ!!

حكم البراءة اللي صدر

هيجيب ف يوم حق الشهيد؟

هايطفّي من قلبي الحريق



أنا اهو معاك وهاقول صحيح

لو اللي قاتل كان برئ

ولا يوم قتل ولا قال لهم ؟

طب هاتوا كل الناس بقى

واسالوهم ... حلفوا

يمكن يقولوا همّا مين ... القاتلين !!!

....

# الخوف

الخوف معشش...

جوه أبراج الحمام من لهفته

طار الحمام فوق في السما

فوق السحاب

يمكن يلاقي في سكته

حبة أمل يفرد جناحاته بأمان

ويشوف طريقه ف دنيته

الخوف ملجَم كل حرف من الحروف

جفّ المداد م المحبره

ضعف القلم ... مقدرش يكتب كلمتين

م الموجوعين جوه الضلوع

كل الضلوع .. متكسره

ووريد بيخنق ف الوريد

الخوف مسلسل خطوته .. شدّه نُورا

آهين يادمة ف وسط خوف  
بين الدما متحجرة  
مشتاقه يوم لحظة أمل  
وميلاد حياه .. مش مقبره  
يافرحه ليه متعلقه  
وبعيده عن كل الإيدين  
حبه أنين جوة الأهات  
متبعتره يا أمنيات  
وخطاوي تايهة في الدروب متعثره  
الخوف طغى  
القلب مات .. والعقل مات  
ياهل ترى راح ييجي  
يوم ونشوف حياة ....  
بين الرفات ؟!!!

....

## الفصل الخامس

عمر القسوة ماكانت طبعك  
ولآ عوايدك .. ولا أخلاقك  
عمر النبض الساكن قلبك  
يوم يستغرب إحساس جالك  
داعب وتر القلب ب رقة  
زود دقة جوة ضلوعي  
وزود جوه ضلوعك دقة  
لخبط كل مسار النبض  
زلزل بيه كل الشرايين  
يسري الدم ف قلب عروقك  
جوه ويريدي  
بيني وبينك مش فصلين  
ممکن فعلا جايز فعلا  
إن ربيع هيجب خريف

وها نتحدى الشتاء ببروده  
وها نتحدى حرارة الصيف  
ونعيش سوا في الحب اتنين  
ويكون لنا الفصل الخامس

....



## إحلم

إحلم حلمك لو مكبوت  
واصرخ صرخة بعلو الصوت  
وافهم مهما تعيش ف الكون  
سنة.. سنتين...ده العمر بحاله  
لحظة وبين الحيا والموت  
جايز تلقى الخوف ف طريق  
تلقى الضلمة ف لحظة ضيق  
أو يوم تلقى ضلوعك ضاقت  
أو تتحمل غدر صديق  
شيئ من ضعف خطر على بالك  
ولا مرارة ف بلع الريق  
أذكر ربك  
تلقى حياتك صبحت نور  
تلقى سواقي أمل بتدور

تروي حياتك  
تلقى الأمن يزيح الخوف  
تلقى الحب أمان مبدور  
أذكر ربك  
وبإيمانك إني ما بينك  
وارفع بين أحزانك سور  
تلقى حياتك نور على نور

....

## إِطْمَئِنُّ

أَنَا فِ بَعَادِكَ مِشْنُ رَاحِ أَمُوتِ  
مِشْنُ هَاسْتَسَلِّمِ وَلَا هَا اَتَكَلِّمِ  
وَلَا رَاحِ تِسْمَعِ شَكْوَى بِصُوتِ  
مِشْنُ هَا تُضَاقِ وَلَا هَا تُخَاقِ  
وَلَا قَلْبِي هَا يَرْفَعُ نَبُوتِ  
إِطْمَئِنُّ

مَآنَا قَلْبِي مَعَاكَ بَقِيَ نَبْضُهُ حَجْرِ  
كَانَ عَشْقُهُ مَلَآكِ.. غَيْرِ أَيِّ بَشَرِ  
عَلَى جِرْحِهِ وَخَوْفِهِ قَدْرٍ وَ اِنْتَصَرِ  
إِطْمَئِنُّ

أَنَا نِسِيْتِي خَلَاصُ الْآهِ  
وَ الْحَرَمَانَ اَنَا وَ أَخَذَهُ عَلَيْهِ  
طُولُ عُمْرِي وَ أَنَا عَآيِشُهُ مَعَاهِ  
أَنَا لَوْ قُرْبِكَ قَلْبِي يَمُوتِ

يَبْقَى بِعَادِكَ عَنِي حَيَاة

إِطْمَئِنَّ

أَنَاعِن نَفْسِي خَلَاص هَانَسَاكَ

عَمْرِي مَا أَفَكَّرَ يَوْمَ فِ هَوَاكَ

لَوْ جِئْتُ يَوْمَ رُوحِكَ تَسْأَلْنِي

هَاتِصَدَقْتِي

رَاحِ أَقُولُهَا إِحْنَا كَرِهْنَاكَ !

وَاطْمَئِنَّ

.....

# إنسان

فكرت ف مرة ... تكون إنسان

تدفن أحزان ... كات بايئة ...

ف نن حباب العين

أو ليك قلبين...

الأول نبضه لأحبابك والدقة حنان

والتاني عشان ... أما يقابلك

ف الكون حرمان

هايمد إيديه... يفرد شريان

ويصب الود لقلب الغير

فكرت تطير... من غير جناحات

فكرت تبات...

في حكاوي الخوف

المقسومة بين الرمشين

وف نظرة عين...



كات مرسومة...

والضحكة أنين

أو بعد سنين

قلبك غاوي

دقّه غناوي

بتعدّي بحور الشوق

فكرت تفوق...

وتمد إيديك... ترفعها لفوق...

وتقول يا معين...

يامنّبت عقل وقلب ودين

....

## أبيات القصيدة

كل ما تنادي عليا  
كنت بارجع لك ليلاتي  
واحلم اني جوه حزنك  
بين ايديكي أمنياتي  
كل حبة رمل فيكي  
بالتقيكي .. شايلة أجمل ذكرياتي  
كل دمعة نازلة مني  
كل بسمة ضحكها سنّي  
تنتهي فيها آهاتي  
كل ليلة تنام عيوني ... بين جفونك  
باحلمك آمال حياتي  
بارمي كل همومي عندك  
لو تميلي / قلبي ساندك  
بين إيديا وروحي ليكي

واشتركي بنور عينا ونبض حبي

واستخبي

بين ضلوعي ..جوه قلبي

طمني بالود روعي

نوري بالحب دربي

ليه قصاد قلبي معانده..

حتى عيني عليكي شاهده

كل دقة من وريدي ... ليكي رايده

كل رمش من رموشي

فات وهدي ... يا عنيده

بظلي مرة المناهدة

والمسي بالنجم كفك

واندهي الفجر بشفايفك

طول حياتي قلبي شايفك

ضله جاية ... تتولد أيام رجايا

تمسحي الدمعة ف بكايا

ترسمي الضحكة ف غنايا

ياهنايا

وانتي واخذه روعي عندك

بس مش محتاجة اقول لك

انتي مهما كنتي جنبتي أو بعيدة

كل ما اكتب لك بحبك

بالقى كل حروف هواكي

تملا أبيات القصيدة

....

## أجمل عروسين

هنلق زينة ف حتنا  
دايرن مايدور حوالين بيتنا  
والمح نرشه على العروسين  
يحميهن من شر الحاسدين  
ويارب يتم فرحتنا  
كل الحة جاية تبارك وتهنيها  
دي عروسة قمر ، رب احميها  
وعريس خفه رب يهنيه  
زاين الزفة ... ومنورة بيه  
يحميهن من شر الحاسدين  
والمح نرشه على العروسين  
ويارب يتم فرحتنا  
هو نصيبها ... وهي نصيبه  
م الليله خلاص مش هاتسيه

راح تحضن وياه .. فرحتها  
وايام هتعيشها بحلاوتها  
يحميهم من شر الحاسدين  
والمح نرشه على العروسين  
ويارب يتم فرحتنا  
ادعي له وخلي بالك منه  
من أكله ولبسه ومن أمه  
حطيها ف عنكي وقلبك  
رضا جوزك ده من رضا ربك  
هيشيلك جوه حباب العين  
يحميهم من شر الحاسدين  
والمح نرشه على العروسين  
ويارب يتم فرحتنا  
وأنت يا عريس خدت هدية  
أخلاق وأدب ، متربية  
تعاملها بلطف وحنيه

هتشيئك فوق الراس والعين  
يحميهم من شر الحاسدين  
والمح نرشه للعروسين  
ويارب يتم فرحتنا  
ابعد يا حسود و مالکش مكان  
ده عريس وعروسة جمال وايمان  
هايعيشوا حياتهم ع القرآن  
والسنة تالتهم أصل الدين  
يحميهم من شر الحاسدين  
والمح نرشه للعروسين  
ويارب يتم فرحتنا

.....

## أَعْدَرَ مَنْ أُنْدَرَ

فكرني كده

من إمتى الليل .. ببعدي عليا  
وأكون نايمة ... أو في الأحلام  
ده الصبح اللي بيسبقتي ضياه  
بالاقيني وياه .. وعينيا الصاحية  
.. ف ضل خطاه ... وراه وقدام  
من إمتى عينيا متابعة سواك  
وإن عدى عليًا ....كثير وياك  
غير خطوة قلبك مش شايفه  
غير نبضة روحك مش عارفة  
غير ضحكة وبتلاغي شفايفك  
قلبي و شايفك

من بين شراييني المشتاقة ... لحنان حبك  
من بين ضلعيني المحنيين ... حاضنين قلبك

فكرني كده

من إمتى حنان قلبك خضّر  
وعنيك ف حروفي و أوراقي  
من إمتى حنينك بيسهّر  
قمرك ف الليل بعد فراقي  
أو دمع عنيك بات بيفكّر  
ف هوايا ف قلبك لو باقي  
من إمتى الخوف حاضن قلبك  
من هجري عشان قلبك يقدر  
يرتاح من حيرة أشواقني  
إن جاك الهجر ف فكرك يوم  
إهجر .. قد أعذر من أنذر !!

.....

## أنا خائف

أنا خائف .. ومش عارف

حياتي اتخذ لي قرار

ده أنا المسجون

وأنا المطحون ..

ما بين ضرسين عذاب ومرار

وأنا المربوط على بطني

من الحرمان .. جميع لحجار

صحيح عايش على أرضك

لكين رافضك ..

وجوه القلب قايد نار

وأنا المحروم من الضحكة ..

من الفرحة ،

تعدّي جوه شراييني

بُكا عيني يسيل أنهار



وتيجي عنيا ف عنكي  
والاقيكي .. مفيش ولا مرة حساني  
وشايفاني... ولا اديكي تطبطب يوم..

على جراحي

وابات صاحي

عشان عينك تنام ..ترتاح

وادوق أحزاني جوايا

عشان قلبك يزيد أفراح

وباغزل م الهموم توبي ... ومكتوبي

أعيش مخنوق ف أرض براح

وأغمض عيني واحلم لك

أمل جاي لك

وجناحينه هنا وفرحة

واشوف البسمة في شفايفك

واموت جنبك وانا مرتاح

.....

## أول لحظة ف عمري

شافني ف أول لحظة ف عمري

كنت ساعتها أنا نونو بـ وأوأ

بص لابويا وقال له : عروستي

أول مرة أنا قلبي بيعشق

من ساعة ما شافتها عيوني

عصافير مخي طاييره تزقزق

..

قال لابويا أنا مشغول بالي

جوز هالي وتبقى حلالي

حتى إن تطلب مهرها غالي

هاأدفع عمري ، وهاأدفع مالي

وشمس حياتي معاها ها تشرق

..

مش عايز عفش ولا عزال



بيكفني إن قلبها مال  
ولا يفرقش معاها المال  
هتاخذي على قد الحال  
وتحوط بحنانها عيالي  
ومعاها الأحلام تتحقق

..

أكبر بيها وتكبر بيأ  
تبقى حياتي وفرحتي هي  
وتعيني ف أيامي الجاية  
ماتكونشي مع الدنيا علي  
تفهمني من قبل ما هنطق

....

## بنت عمري

يوم ماشيلتك جوه مني  
نورت بيكي الخلايا  
فتحت زهرة شبابي  
زهزت شمسي ف سمايا  
لما كفك نام ف كفي  
نشف الدمع ف بكايا  
قبل منك .... كنت بتمناكي..

من ربّ البرايا  
كنت باتخيل ملامحك  
جوه حلمي وف المرايا  
كنت باتخيل ف شعرك  
ليئه بيهفهف ورايا  
كنت باتصور عيونك  
غمازات بتبوس خدودك

رقة دايبة.. جوه صوتك

لما يوصل لك ندايا

كنت باستنى ابتسامتك

تحضن الأحلام معايا

ضيّ عيني.... واتولدي

فتحت كل الزهور

زقزقت كل الطيور

شق قلب الضلمة نور

وجيتي إنتي ... حته من قلبي سكنتي

واختصرتي .. كل أيامي في عمري

لسن واحد / العبي أمي معايا

: خلاص ياستي

تقولي : لسة ، وتستخبي

و..أعد من واحد لخمسة

أنتي فين ؟ فينك انتي ؟

امسكيني يا امي يالآ .. وتجري مني ..

واعمل اني مش معاكي...  
بس روجي بيكي حاسة  
واسمع الضحكة تجلجل  
من شفايفك بين دموعي  
ضحكة تملأ الكون عليا  
جوه ودني ..وبين ضلوعي  
باشكر المولى عليها  
بين سجودي وفي ركوعي  
واما باسمع اسمي منك  
( ماما..ماما )  
قلب ماما... عمر ماما  
تحضنك كل السلامة  
بادعي ربي يابنت عمري  
تسعدي في الدنيا ياما  
تهجر الأحزان عيونك  
تملا قلبك لابتساماة

يفرح العمر بشبابه  
ده انتي اسمك عندي غالي  
سَطْرَه ربي ف كتابه

.....

## بطلّ تحلّم

جرب مرة تطول الشمس

قوم كسرّ جناحات اليأس

قوم جرب تحضن أحلامك

بين رمشين

بين حرفين وكلامهم همس

جرب لو محتاج إثبات

إن هموم الفكر ساعات

تقتل احساس قلبك لو حس

جرب تختار بين حلم كفيف

أو قلب يضيف مش ياخذ بس

جربت تشوف أو هام الخوف

بتنام ف عنيك

أو بين شعاعين

من ضي الشمس

جربت تعيش من غير شريان

بيمد القلب بشوق وحنان

ومعاه إيمان

ف ورید يتحس

.....

## حب حقيقي

لو تحلف لي ...  
من دلوقتي لغاية بكرة  
إن خيالك مشغول بيا  
لو هاتقيد لي صوابك عشره  
وإن حياتك ملك إيديا  
واني بجد ف قلبك جوه  
ولا فيه لحظة تفرط فيا  
مهما هاتيحي قصادك قوة  
مش هاتخرج حبك ليا  
بعد فراقك مش راح اصدق  
إن كلامك ليا حقيقي  
وان حنانك ... نبضة قلبك  
كانت ف الدنيا دي .. رفيقي  
وان النظرة الواحده بعينك

كانت بتنور لي طريقي  
مش راح أصدق  
لو تحلف لي  
إن حياتك .. نار ف بعادي  
وان الدقة ف قلبك حايرة  
وان دموعك ... سايلة قصادي  
ريح روحك .. واسحب بوحك  
ظلمك .. جرحك  
كنت البادي  
قلبي اتحرر... من إحساسك  
هو ف وادي  
وانت ف وادي

....

## الحنن خطاوي

مد يادمع الحزن .. خطاوي  
عدّي القلب لحد العين  
سيب القلب .. كفايه جراحه  
واثبت لحظة .. مابين جفنين  
دق القلب اتشبع منك  
وافرد بيه .. جناحات الحزن  
لجل يطير .. من فوقها لبر  
تملا القلب آيات الفرحة  
يسعد نبضه بعد المر  
أو يتلفت بين أزهارها  
يسقي مودة ... ويحصد عطر  
مد يا دمع العين .. خطواتك  
روح بأهاتك .. وامشي هناك  
عند الحاسدين .. واللايمين

وإن مالقيتس .. هناك ليك مطرح

لف تعالى .. على الرمشين

.....

## حفيدتي أسيل

قمر في الحسن .. ماله مثيل

جمال خدين .. بياضه دليل

إذا طلّت على العيلة

جمالها .. ع الصبايا يسيل

أدب ، أخلاق .. مفيش بعديه

ونظرة عين .. تداوي عليل

ياناس م الرقة معجونة

بطيبة قلب وحنونة

في شقاوتها وطعامتها

بموت فيها .. وقلبي يميل

تشوفها العين وتتحير

وتسأل بعد ما تفكر

دي مخلوقة من السكر ؟

أكيد دي ملاك ... بإسم أسيل

....



## حلم من شهرين

وجيت ف الحلم .. من شهرين

وخذتك بين دراعيني

تراعيني

تقول يامه يااضي العين

دي صورتك يامه ف النني

وفارده جناحها ..بين رمشين

دعاكي ليا كل صباح

بحسه نبض تكويني

وبادعي يكون رضا قلبك

كمان يسري بشرائيني

ده قلبي م البدا راضي

وبادعي لك .. ليوم الدين

تفرّح قلبي بعيالك... وراس مالك

يارب يكون بنات وبنين

وعارفاك ع الحدود ف الجيش  
حياتكوا فدانا لجل نعيش  
ويوم ما تجيني أخبارك  
وأسمع م البعيد صوتك  
ينادي عليا من دارك  
ينط القلب م الفرحة  
واقول يارب تحميكوا  
تعودوا لأهلكم سالمين  
صحيت اليوم على ضيقة  
ودمعة ف قلبي مخنوقة  
واقول يارب سلمكوا  
باصلي الفرض وادعي لكوا  
لكين سهم القضا صابك ف نني القلب  
صرخت بكل أحزاني...وقولت : يارب  
تصبر قلبي ف فراقك  
لحين ماالقاك

أنا راضية عليك  
هاصبر بعون الله  
وبادعي لك شهيد يابني  
وف الجنة يكون مثواك

....

## خِص الكلام

نايم على جنبه اليمين  
وتحت راسه مخدتي  
علشان اقبله في المنام  
ويشوف بعينه ضحكتي  
ماسك بإيده منديلين  
قال ايه هايمسح دمعتي  
عثمان اصالحه بنظرتين  
واسحب معاهم شكوتي  
قال إيه ! هاسامحه بكلمتين  
وافتح له أبواب جنتي  
وعوده كانت في الغرام  
كلام وقاله لحضرتي  
قاضي القلوب احتار معاه  
ولا يوم حكم ف قضيتي

قلبي خلاص ملّ ف هواه  
وارتحت بعده ف وحدتي  
خلص الكلام وقت الخصام  
نزلت سنابير قصتي  
ينام على الجنب الشمال  
ينام على الجنب اليمين  
أنا مش هاروحله في المنام  
ماهي سكتّه غير سكتّي

....

## داري عني

داري عني دموع عنيكي

داري خوفك .. جوه قلبك

لمي حزنك .. بين كفوفك

وادفنيه في جب جوفك

واقفليه ...

واوعي يوم تتذكره وتفكري

توب العزا .. يوم تلبسيه

الحزن راح

طابت جراحننا من زمان

والليلة فرح

ازرعيه مابين شفايفك

لجل أشوفك

زي ما كان قلبي شايفك

طول حياتي



ما انتي بكرة وفجر أمسي

وأنت طين بيضم غرسي

بين تراب أرضك حواسي

بانتظر يوم الحصاد

يوم ما قلبي يلّم قمحك

يوم ما جسمي يضم فرحة

جمع قطنك

....

## رسالتي وصلت ؟

بعثها ....

منقوش حروفها بالأنين

بكت عليها كل عين

مكتوبة ... بجراح وقتها

وذكرت فيها شكوتي

سهر عينا ف وحدتي

ولا يوم قابلت محبتي

ما بين ضلوعك سلوتي

طيفك فارقتي وانتهى

قلت اللي زعلني ف هواك

بتكون معايا وأكون معاك

روحك وفكرك كان هناك

مع قلب غيري لوحدنا

فكر في غيري واخدعه

حبك ف قلبي أنا هاامنعه

لوجه خيالك ..

جوه فكري هاأرجعه

لو نبض قلبي حن ليك ..

مش هااسمعه

ابعد خلاص ..

فارق حياتي ... كلها

....

## روحي عندك

روحي عندك

إسألها .. وحلّفيها

لوف يوم .. قسيت عليها

أو عرفت واحدة تانية

ولّا قلبي مال إليها

أنا ما أعرفش ف حياتي

غيرك إنت يا أمسياتي

سهرى ليكى .. وعاشه فيها

إسالى روى .. تقول لك

عن حنانى .. وشوقى ليكى

بننظر منك نهاية

لغيرة مدفونة .. ف عينيكى

أتكلمى .. يالا أشرحى

كل حاجة .. خيفة فيكى

مش هاتجاوبك عينياً  
ولا لمسة من إيدياً  
مش هاتطول القضية  
هى كلمة واحدة لئياً  
يقولها قلبى ولا نبضه  
ولا ليلة ف عشق سهده  
تقولها روى بكلمة صادقة  
منى ليكى ..  
مصدقانى ...  
ولا أحلف لك ياغالية  
بنور عينيا ... وحبى ليكى

....



زِيّ ما انتَ

لو تمرّ سنين عليك

زي ما أنت !!

مش هاتتغير حياتك! أو مشاعرك

مهما كان إحساسي ليك

مش كفاية سنين... عيوني م السهارى

والرموش أيام حيارى

والدموع مالية الوريد

مش بعيد

كل يوم بيفوت عليك

بتزيد جفاوة

شئى بيتبدّل ف ذاتك

قسوة تطرح من جديد

....

## سواقى الهمّ

من بين سواقى الهمّ

سال الدما أنهار

اخوات واولاد عم

ويكون ما بيننا تار؟!

ومين زرع فينا

سلسال قابيل والعار

عُرابه فوق منّا

يحفر قبورنا دمار

ياللى أنتو من أهله

غله ما بيننا شرار

اتبرو من فعله

أصل الشيطان غدار

واقف لنا وبيننا

لكن شيطان جبار

حالف لـ يستنظر

أتباعه ليل ونهار

تمشي وراه دائما

ياخذ ايديك للنار

....

## شحاتة مشاعر

أنا مش هاأشحت مشاعرك

ولا عمري شحتّها

ولا يوم هاأستجدي عطفك

دانا اموت من قبلها

ولو كلمة بحبّك

قلبك مش حسّها

تحرم على قلبي حتى

لو بشفايفك قولتها

أشواقنا كانت دفانا

في ليل البردانيين

والهمسة ساعة لقانا

بتدوبنا ف حنين

كان حبي ليك حكاية

يحكيها العاشقين

ليه وصلته النهاية..  
راح من ايدينا فين ؟  
فيه حد دخل حياتك  
خد من قلبك مكاني؟  
راح ألم شظايا قلبي  
وكفاية جراح هواني  
هابكي بدموع عنيا  
على حب زمان داواني  
وسكنت فيه وقلبي  
كان ساكن طول زماني  
ارجوك قول الحقيقة  
ماقدرش اعيش دقيقة  
على وهم الحب تاني

....



## شوفت ازاي

شوفت ازاي...

اني ماكنتش قادر أعرف

حبك ليا كان ازاي

وان الشوق الساكن قلبك

جرح القلب بكل قساوته

صرخت منه قولة آي

حتى الكلمة الدافية ما بينا

بردت فجأة من جواي

حزنت قوي ع الحب الصادق

أقصد كان خادع ف هواي

كان الحب اللي بتوعدي

يدفي القلب

ويعيشني العمر الجاي

شوفت ازاي

وعدك قلبي ... كل وعودك

طلعت منك ليا سراب

كنت مصدق كل كلامك

تدبح قلبي بشوق كداب ؟

حتى اللمسة الحانية

ف ايدك كت على قلبي

شوك وعذاب

كل كلام الحب مزيف

واسأل نفسك

بس تجاوبك

هو الزيف بين الأحباب !؟

....

## صرخة وليد

صرخة وليد بين الحطام

نادت قوام ويّا الألم..

صرخة وشقت بين ضلوع... الإحترام

لكن صداها.... كان عدم

تاقت ما بين .. وهم الحدود ..

أسوار جحود .. عدم اهتمام

والرعب لتزول النعم

الصرخة بتنادي الجهاد

لاقت الجهاد فوق الفراش

بين الوهن

لاحت سيوف الذل من بعد الكرم

لجل ماتحصد رقابنا

لجل ما تطعن قلوبنا

لجل ما تصرخ

وتملا الكون بأهة  
من عذابنا  
صرخة ولید بین الحطام  
دمعة عینیه فوق للسما  
یارب انت المنتقم  
بکت السما من شکوته  
نزل المطر من ربنا برحمته  
نام الولید  
من غیر ما یأخذ رضعته  
للجنة وف یوم الحساب  
الرضعة كانت سبقته

....

## فرحتيني

فرحتيني..... يااضي عيوني

لما نجحتي واتفوقتي

كل الدنيا ماهيش سايعاني

ماانتي ذاكرتي ياقلبي تعبتي

طول السنة ف كفاح بتعاني

قلبي وكان بيظوف حوالكي

يدعي المولى يارب احميكي

فاكهة عمري إنتي يابنتي

لما الخوف بيبان ف عنكي

تجري ف حضني : خايفة ياماما

يضمك قلبي بكل حناني

وأما تططبب إيدي عليكي

تنسي الخوف من بعد ثواني

في امتحاناتك قلبي بيدعي

رب يبسر فهمك ليها  
تقري الورقة بكل سهولة وتحليها  
وأما تراجع الورقة  
تلاقي صح إجابتك كلها فيها  
وأما نتيجتك ظهرت كنتي  
الأولى يارب تخليها  
شكرا ليكي يا حلم حياتي  
فرحة قلبي بتحليها  
م الحاسدين ربنا يحميها  
وبكرمه يبارك خطاويها

....

## قسوة قلبك

انت ليه بالقسوة ديا  
ليه بتجرحني بايديك  
كل ما أقرب شوية  
تبتعد عني بعينيك  
وكل ما بيحن قلبي  
قسوتك تنضح عليك  
مهما أضحى سنين  
فى حبك برضوا أنا  
لعبة ف إيديك  
قلبي شايف كل صدك  
وبحناته بيراضيك  
....  
إنت عايز قلب غيره  
قلب بيفتّح جديد

قلب لسة يادوب بخيره  
نبتة بتنور ف إيد  
إنت مش عايز آثار  
ولاً ترعة ف وسط دار  
إنت عايز غيط مزهزه  
قطن وبريحة الخضار  
قمح جوة سنابله جامد  
مش قلب داخل لحتضار  
وإنت طبعا كنت مادد  
إيده وبشوق انتظار  
مش ها منى نفسى تانى  
مش هعيش أحلام بعيدة  
مش راح أخدع نفسى تانى  
واشترى أحزان جديدة  
ولا هااستعطف فى قلبك  
لاجل أعيش أيام سعيدة

مش هاكلم قلبى عنك

ولا هسحت يوم لحبك

ولا هاتذل لقلبك

هابتعد وأعيش وحيدة

....

## قضببان خوفك

محبوس داخل قضبان خوفك

مخنوق متعلق من جوفك

مش قادر تصرخ جواك

فاكر قلبك نبضه ف قوه

شايف نفسك ألف فتوه

بص كويس

قضببان سجنك مش هاتعدي

كوابيس رمشك جاية تهدي

واتاريك متفتت من جوه

خمسین طعنه معلمة فيك

فين أراضيك

فين النبضه.....

وفين الضحكة

صعبة عليك؟



أو كنت جبان؟!

خايف ترسمها على عيونك

خايف متحير من كونك

نصين متقسم أو أكثر

أو جازي خلف القضبان

مات الإنسان

مات الإنسان

....

## قطر قلبي

مش هاوقف قطر قلبي

لجل ماتركب سعادتك

حتى لو كان كل حبي

رصيف بيتحمل قساوتك

جت ليالي السهد عدت

بين محطاته الأخيرة

مهما بان الفجر فيها

ضلمته كانت كبيرة

هدت الأحزان ف قلبي

وعدت القسوة عليها

كات رموش أحلامي تايهة

بين كوابيسي الكثيرة

رهبة الهجر اللي فاقت

كل أيامي المريرة وأنت فيها

مافي يوم القطر هدى  
أو وقف لي رغم اني كل يوم  
بابني في رصيف ما بين ضلوعي  
واحضن الهمسة تقولها  
برد روعي يصير ربيعي  
واسرق الحلم ف عيوني  
تختفي في الحال دموعي  
قطر قلبي مش هاسيبه لحد تاني  
يجرحه أو يشتريه  
ومش هابيعه غير لقلب يحس بيه  
قطر قلبي له حكاوي ....  
بين محطات لإنتظار  
كل لحظة يعدي فيها  
بالأمل يحيي النهار

....

## كلموني عليك

كلموني كثير عليك

خوفوني بجد منك

قالوا عايش ع التسالي

قلبه عمره ماليكي شاري

قالوا داري عنه حبك ..

جوه قلبك في الكرار

قالوا خبيه ... جوه دايرة لإنتظار

قالوا ما ينفعش أبدا

إن ليل يحضن نهار

إن شمس بدون دفا

وشعاعها برد جوه نار

قالوا خافي ع المشاعر

وإن مش معناها أبدا

إن نبضه بيكي شاعر

وإن عينه شايفه لهفة  
شوق في قلبي بس حاير  
قالوا إنه كان ضحية حب  
كان مجروح وكان  
وإنه كان جوه الخيانة  
من حبيبه بتاع زمان  
قولت من غير أي سيره  
هاامسح الجرح القديم  
وأمحي كل ذكرى ليه  
وازرع الحب ف حياته  
كل يوم قلبي راويه  
وابعد الخوف عن عيونه  
واشرب الود بإيديه  
بكره مش هاتقولوا جرح  
بكره قلبه بحبي طارح  
والحنان بينا يناديه

## كله زاييل

ياللي هتموت ع الجنيه  
الكفن مالوش جيوب  
إيه يفيد القرش إيه  
يوم ماترجع بالذنوب  
تتملي صفحة كتابك  
راح تزيد وقفة حسابك  
يومها ماhtقدر تتوب  
مافي شئ ف الدنيا دايم  
وإن جريت جري الوحوش  
مش هاتأخذ غير نصيبك  
رزق غيرك لن تحوش  
للفقير حقه ف مالك  
هو رزق الله إليك  
إن تجود بالصدقة حالك

راح يزيد والبركة ليك  
تقلّ الموازين بكلمة  
تبتغي فيها الإله  
عطرّ الخدين بدمعة  
في التراب إحني الجباه  
يوم لقا ربك ميزان  
كفه ذنب وكفه طاعة  
والرسول واقف عشان  
يسأل الرحمن شفاعاة  
لو تطيعه يكون مصيرك  
جنته أجمل ثواب  
وإن عصيته هاتلقى ناره  
وانت مش حمل العذاب

....

## كله منك !!

غربتي كات غصب عني  
بعد توهمت نفسي مني  
كنتي جوه عيوني نني  
كنتي أقرب ليا مني  
كل ما بيهدو با بني  
كنت شايل لك حمولك  
كنت فعلك قبل قولك  
كنت نبضة دق قلبك  
كنت سايبك تفرحي ما بين ضلوعي  
حتى جوعي  
كنت بانساه لجل خاطرک  
ياما قلبي عاش ف ضلك  
ياما قال لك : إن قلبي نبضه إنه  
يعشقتك في كل لحظة

مش ملاحظة ...

إن خيرك مش لكتفي

وإني بهتف لك بإسمك

لمّا شق الخوف شفايفي

وإن نهرك جف نبعه

بعد ماكان نبع حرفي

وإن صدرك ضاق بحبي

صد إحساسي وعواظفي

ليه ياغاليه .. تنظفي فيكي شموعي ؟

ويوم رجوعي ...

ماالتقي حضنك سكن

ياترى عايزاني تاني

ولّا في أحضان بعاذك

أمشي ادور عن وطن

....

## لقمة عيش

عشان مالناش وطن تاني

بنتحمل وبنعافر ف لقمة عيش

عشان ماننام ف أحلامنا

ومانخاف يوم من الخفافيش

عشان خوفنا يموت فينا

ويبعد حزننا مايجيش

وحالف لجلك أتحمل

وها أكمل ولو معايش

ينام حلمك مايبين رمشي

ومش هامشي

ده لحم كتافي من خيرك

ده أنا طيرك .. بلف سماكي وبعاود

ماليش غيرك ، وأنا ونيلك

حكاية حب مرسومة على توبك



ده أنا أحمس لأسوارك  
وأنا القمر اللي محبوبك  
وشايل عنك احمالك  
سؤال داير في افكاري  
وردي عليه !!  
بحور الدم ليه سائلة بدال نيلك ؟  
وليه كل الولاد عاملة  
مراكب حزن في سبيلك  
وليه شمس الصباح هاجرت  
وظفَى الهمّ قناديلك  
وليه قفل الشجن بابك  
وليه مش عارفة أحبابك  
سماكي بتحضن الغربان  
وتستنّى ظلام ليلك  
غرابك ينبش الأحزان

يَخْرَجُ مِنْهَا هَابِيئِكَ

قَابِيئِكَ فَيُنْ؟

مَلْطَخِ اِيْدِهِ بَدْمَانَا

مَمَزَعِ مَنَا جَوَانَا

وَبَعْدَ سَنِيْنٍ وَمَشْ قَادِرْ

وَلَا عَارِفِ عَدْدَهَا اِيْهِ

وَلَا قَادِرِ يَحْسَنَ بِلَهْفَةِ الْاَوْطَانِ

وَحَبْهَ لِيْهِ

وَمَشْ عَارِفِ يَقْدَمُ دَمَهُ لِيْهِ قَرِيْبَانِ

عَشَانِ يَرْضِيْهِ ، وَلَا عَارِفِ

لِيَحْفَرُ قَبْرَ وَيَتَاوِي

الْحَبَابِيْبِ فِيْهِ

....

## ليه العتاب؟!؟

بعد التحية والسلام

والسؤال عن صحتك

بتقول تمام

طب ليه دموعك..

غرقت قلب الجواب

وليه بادوق جوه الحروف

طعم العتاب .. ليه العتاب؟

والدمعتين جوه العيون

حتى الجفون تعبت سهر

والرمش داب

وان القمر ف بعادي غاب

وصاحبت لي كل العذاب

ليه العتاب؟

ده انا قلبي من احساسي تاب

نبض الوريد أصبح سراب

حتى دمع العين ف بعدك

خد قرار الإنسحاب

ليه العتاب

ماانت اللي فارق جنتي

ودنيتي

بإديك هجرت محبتي

وقفلت بعدك ألف باب !

....

## مسيرك يوم

وعاشر قد ما تعاشر  
مسيرك يابن آدم يوم  
تفارق كل أحبابك  
ده موتك م القدر محتوم  
هاتعمل خير ف دنياتك  
هاتتونس ف قبرك بيه  
ميزان حساس لأعمالك  
صراط شعره تعدي عليه  
وياك م الذنوب والشر  
وصفي النية قبل القبر  
وصدقني ده جاي لك يوم  
وقوفه يطول ف عز الحر  
كتابك بين ايديك اقراه  
ده عملك بالتمام جواه

هاتعمل خير تلاقى الخير

ولو كان شر راح تلقاه

ده ربك عدل مش ظالم

مناف رحمته ورضاه

وشربه نرتوي بيها

من الكوثر غسل محلاه

شفاعه ياربي من طه

وجنة في النعيم وياه

....

## من الأول

تعالى نعيد من الأول  
نلم جراح خطاونا  
نحاول ننسى أحزاننا  
نطبطب فوقها بإيدينا  
ولو فوق الخدود دمعي  
مايمسح دمعتي غيرك  
براح صدرك لأسراري  
ودارك بابه من داري  
وخيري من ربوع خيرك  
ونظرة بكرة ف عينينا  
تعالى نعيد من الأول  
ونتكلم .. ونتعلم  
من اللي فات  
ونفتح طاقة الذكرى

ونتشارك .. ونتعارك  
وآخر اليوم نعود إخوان  
تعالى نلّم في شتاتنا  
ولو فاتنا سنين وإيام  
هايرجع بالأمل بكرة  
ولو تسأل عن امبارح  
خلاص ننساه ... لأنه مات  
لكين لو حد جه بينا  
وحاول يوم يفرقنا  
يلاقينا أسود واقفين  
ف وقت الشدة والأزمات

....

## مِيت لُون

ناس ليها حظ ....

وناس مالهاش

ناس البخت يعدي عليها

وناس البخت عليها ماجاش

ناس بتغير جلد ف ثانية

وناس الجلد مغيرهاش

ناس بتحب الدنيا بحالها

وناس ف قلوبها الكره بلاش

ناس تتلون مليون لُون

في الثانية الواحدة

لوف الكون

اتنين ف مثالها

هانفارق دنيا ماتتعاش

....

## مين علم قلبك يعشق!؟

كل ما بفتح شباك قلبي

لضيّ عنيك

كل ما اصالح نفسي وعمري

وروحى عليك

كل ما بيعت أشواق حبي

تطوف حواليك

وانت بعيد

باسمع كل الهمس ف ودني

وليه تعاندني....

وتقفل كل موانى ضلوعك

قبل ما ترسى سفينة حبي

وتسكتني

كل حروف الخوف فى ملامحك

لو هاتفكر...



قلبي يسامحك؟!  
بعد فراقك ليًا سنين  
إني هـ ألين ... أو هاأجري عليك  
ملفوف قلبي بكل حنيني  
ودموعي عيني مش بتملّ  
طب والحلّ؟!  
بعد الحب ف قلبي ما كلّ  
بعد هوان قلبي المحتلّ..  
بزيف أذارك  
كان ليه حبّك ....  
ولّا اختارك  
مهما تصلي  
وكانت دقات قلبي  
القبيلة ... لكل مزارك  
مش راح يغفر  
يوم أوزارك

مش راح يفضّل

دوران نبضي ف نفس مدارك

هارجع ألم ستاير جرحي

هاغزل فرحي بخيط أجزاني

من طعناتك

همسح كل حروف أشعاري من أبياتك

تفضا قصاديك من إحساسي

وإسأل نفسك .. يمكن ناسي!!!

مين كان علم قلبك يعشق !؟

....

## هونت عليك

وبافرش لك صوان فرحك

تقوم تتحنى من دمي !

وكل ماتعلا جوه الحلق زغرودة

ألاقي ايديك بتزرع دمة

بتغرّق عيون أمي

وهونت عليك

تقطّع كل شرابييني

تهدّ ف بيتي وتجيني

تقول لا إحنا.. ولا كنا

ف يوم اخوات

ولا حضن أمي جمّعنا

ولا عاد بيتنا بيساعنا

حفرنا بينا ليه مسافات

تمد إيديك وبقاطعها  
وأمد إيديا تقطعها  
زرعناها بذور عداوات  
وقفنا ليه لبعضينا  
ومين المستفيد فينا  
ومين راح ينهي أوجاعنا  
خلاص بعنا  
عروق الحب ما بيننا!؟  
خلاص هانت عليك روعي  
تقيم فرحك على نوحى  
وهونت عليك  
دموع أمى وأولادى  
تشوفها عنيك  
خلاص قابيل رجع تانى  
فرش ف القلب أحزاني

غرابه من بعيد واقف  
عشان ينبش معاه قبرين  
ولما نموت أنا وانت  
هاياخد أرضنا الأتنين  
ياربييت العقل يتبصر  
نشوف مين اللي بيدمر  
نشوف إبليسنا جاي منين

.....

## ومستني

ومستني .....

يطبطب فوق كتاف حزني

يداري الدمع من عيني

يمد إيديه يطممني

يكون جنبي ف مشواري

يكون داري .. يكون وطني

ويفرش قلبه سجاده

على القمرايا فوق مني

اقول الآه ما بين ضلعه

ودقة قلبه تسكنني

وكنا زمان

بناكل من طبق واحد

ونقسم من رغيف واحد

وسجدتنا لإله واحد

وليه بعد اللي كان بينا  
تمد الإيد وتقتلني  
وليه تخنق ف أفرحي  
وليه بتشل ف جناحي  
وليه في الذنب تسجنني  
ده ربك قال تكونوا اخوات  
تشد الإيد تقويني  
ويوم فرحي تهنييني  
واكون جنبك حدا الأزمات  
أنا وأنت جسد واحد  
صحيح قلبين لكن واحد  
وسجدتنا لإله واحد

.....

## الشاعرة في سطور

الإسم / منى الغريب محمد حسن

الإسم الأدبي / نور الحرف ( شاعرة )

تاريخ الميلاد / ١٩٦٢/١١/٢٣

الحالة الإجتماعية / متزوجة وأم لثلاثة ابناء (ولدان و بنت)

المؤهل / بكالوريوس تجارة جامعة عين شمس

الإيميل / mama\_nour ٢٠٠١@yahoo.com

عضو اتحاد كتاب مصر

عضو رابطة الزجالين وكتاب الأغاني

مؤسسة مجلة / حروف من نور الإلكترونية الأدبية

لها مدونة / حروف من نور الأدبية على الشبكة العنكبوتية

لها مجموعات أدبية كثيرة على الشبكة العنكبوتية

لها العديد من القصائد على المواقع الأدبية المختلفة والمنديات  
الأدبية

فازت بمركز متقدم في مسابقة الشاعر علي أحمد باكثير عن  
قصيدة "الحق ضايع"

حازت علي العديد من الجوائز وشهادات التقدير والتكريم

صدر لها

ديوان / كلما اقتربت منك ( شعر عامية ) / ٢٠١١

ديوان / حضرة صاحب العصمة ( شعر عامية ) / ٢٠١٤

تحت الطبع

ديوان / للهوى .. أعذار ( شعر فصحي )

....

## الفهرس

الصفحة	القصيدة	م	الصفحة	القصيدة	م
٥٤	روحي عندك	٢٥	٢	بطاقة الكتاب	١
٥٦	زِيّ مانتَ	٢٦	٣	الإهداء	٢
٥٧	سواقي الهمّ	٢٧	٤	إبعديني	٣
٥٩	شحاتة مشاعر	٢٨	٥	إفكرتك	٤
٦١	شوفت ازاي	٢٩	٧	الحق ضايع	٥
٦٣	صرخة وليد	٣٠	١٢	الخوف	٦
٦٥	فَرَحْتينِي	٣١	١٤	الفصل الخامس	٧
٦٧	قسوة قلبك	٣٢	١٦	إحلم	٨
٧٠	قضبان خوفك	٣٣	١٨	إظمن	٩
٧٢	قطر قلبي	٣٤	٢٠	إنسان	١٠
٧٤	كلموني عليك	٣٥	٢٢	أبيات القصيدة	١١
٧٦	كله زایل	٣٦	٢٥	أجمل عروسين	١٢
٧٨	كله منك	٣٧	٢٨	أعذر من أندر	١٣
٨٠	لقمة عيش	٣٨	٣٠	أنا خايف	١٤
٨٣	ليه العتاب؟!	٣٩	٣٢	أول لحظة ف عمري	١٥
٨٥	مسيرك يوم	٤٠	٣٤	بنت عمري	١٦
٨٧	من الأول	٤١	٣٨	بطل تحلم	١٧
٨٩	ميت لون	٤٢	٤٠	حب حقيقي	١٨
٩٠	مين علم قلبك يعشق	٤٣	٤٢	الحزن خطاوي	١٩
٩٣	هونت عليك	٤٤	٤٤	حفيدتي اسيل	٢٠
٩٦	ومستني	٤٥	٤٥	حلم من شهرين	٢١
٩٨	الشاعر في سطور	٤٦	٤٨	خِص الكلام	٢٢
١٠٠	الفهرس	٤٧	٥٠	داري عني	٢٣
			٥٢	رسالتني وصلت؟	٢٤

